

ուոյն, և այսպիսի հնարիւք հիմնարկեալ կանդնեաց զայն եկեղեցի մեծ և փառաւոր, և այսպիսի եղանակուս խափանեցան արդիւնք կալուածոցն Երուսաղէմի: Եւ հուսկ ուրեմն՝ ՚ի կարի թախանձելոյ Զաքարիա Պատրիարքի առաքել գոնէ զհաշուս նոցին, և նա յղեաց տասնամեայ ելից և մտից զհաշուետումարն, և դարձեալ սահանջ Աթոռոյն մնաց անդ: Բաց յեկեղեցեաց աստի՝ է և այլ եկեղեցի յանուն Ս. Մինասայ կառուցեալ ՚ի գերեզմանատան: Եւ յետոյ էառ Գարրիէլ ՚ի կառավարութենէ զմի մասն հողաբլրոյն կոչեցեալ Գոճ էլ Էբճն, ուր բնակեալ են յառաջագոյն գերեալքն Հայոց. էառ նաև ՚ի Մէհէմէտ Ալի Փաշայէ՝ ընդարձակ գետին յԱղէքսանդրիա, և խառնեաց ՚ի պարտէզն, որոյ Հէօճէթն գրեցաւ յանուն Ս. Յակոբայ. եւ յետոյ առ 1000 արտավար (Ֆէտտէն) վարելահող ՚ի Կուսակալէն Եգիպտոսի վասն աղքատաց, մնացին անդ և կալուածք Գրիգորի և Պողոս վարդապետաց: Յետ աւարտման շինութեան եկեղեցւոյն՝ ժողովուրդք վիճակին կամեցան վարձատրել և պատուել զհոգեւոր հովիւն իւրեանց. ուստի գրեցին յԵրուսաղէմ առ Պողոս Եպիսկոպոս և Խորհրդական հարս՝ Պողոս Պէյ Եռեսուֆեան, Ալիքսան և Միքայէլ յարգելիք, և թախանձանօք խնդրէին ՚ի նոցանէ տալ զթուղթ վկայութեան Գարրիէլ վարդապետի, զի գընացեալ ՚ի մայրաքաղաքն Սիա՝ ձեռնադրեսցի Եպիսկոպոս. իսկ նոքա ոչ ընկալան առ ժամն զխնդիր նոցա, զի չէր ժամանակ նորա, մանաւանդ առաւել արդիւնաւոր քան զնա էին յԱթոռն արքարժանաւորք այնմ պատուոյ. եւ երկնչէին մի գուցէ անկցի երկպառակութիւն ՚ի մէջ միաբանաց, և երկրորդ զի Գարրիէլ միշտ աստուամբութեամբ վարէր ընդ Աթոռոյն, որոյ վասն առ ՚ի շահել զսիրտ ժողովրդոց և իշխանաւորաց տեղւոյն, գրեցին կոնդակ, յորում հրաման տային իբրեւ Առաջնորդի ունել աթոռ եւ զաւազան և թագ Եպիսկոպոսի, այլ նոքա ոչ ընկալան զայն և ոչ զկոնդակն հանին յերեւան. զի զայդ ամենայն յառաջագոյն Կիրակոս Եպիսկոպոս շնորհեալ էր նմա, եւ ինքն ունէր և կատարէր զամենայնն անթերի, և այսպէս մերժելով մերժեցին զպատճառանս նոցա, և վերստին գրեցին երկիցս և երիցս և ստիպէին զնոսա վաղ ընդ փոյթ առա-